

10. marts 2015

**2015-imut aningaasanut inatsisissatut siunnersuut**  
(Aningaasaqarnermut Aatsitassanullu Naalakkersuisoq)

Siumumiit naalakkersuisut 2015-mut aningaasanut inatsisissatut siunnersutaat tikilluaqqunarpoq, Siumup kissaataatut anguniagaatullu inuiaat siuariartornermut allanguisinnaanissamullu sapiis-suseqartut toqqammaviussapput tamannali naalakkersuinikkut amerlanerpaat suleqatigiiffigisin-naasariaqarpaat taamaatumik Partii allat aamma suleqatigalugit 2015-mut aningaasanut inatsisissap naammassillugu suliarineqarnissaanut qilanaarpugut.

Aallarniutigalugulu Siumumiit oqaatigerusupparput ukioq aningaasatigut inatsiseqarfiusoq kisiat eqqarsaatiginagu imatut aallarniuteqarusukkatta.

Siunissaq ungasinnerusoq eqqarsaatigalugu akit assigiittussaatitaanerata atorunnaarsinneqar-simanera nalilersoqqinneqartariaqartoq inuiaat ataasiusut nammaqatigiissullu attatiinnaqqullugit.

Inuiaqatigiit pigisaat namminersortungorsarneqarsinnaasut sukkanerusumik aqutissiuunneqartari-aqartut, Siumumi isumaqarpugut taamaattumik naalakkersuisunut piumasaqaatigissavarput misis-sorneqassasoq ingerlatseqatigiiffiit Namminersorlutik Oqartussat pigisaat sorliit namminersortun-gorsarneqarnissaannut qulaajaaneq aallartinneqassasoq inuiaqatigiinnut imminut akilersinnaa-sumik, aamma sorliit pisortanit ingerlanneqarpata, kingunissai ersarinneruleqqullugit.

Nunatsinni aningaasarsiorfiusinnaasutigit annertusaanissarput pisariaqarluinnarpoq, tamatumun-galu atalluinnarpoq takornariaqarnerup nunatsinni siuarsarlugu aningaasarsiutaalluarnissaata pilersinnissaa, taammaamat pisariaqarpoq nunatta iluani avammullu silaannakkut angallannikkut periarfissaasut annertusarneqarnissaat eqaatsumik sukkasuumillu inuit angallassinnaaqullugit. Taamamat Siumumiit naalakkersuisunut kaammattuutigissuarput sinerissami pisariaqartumik nutaanik mittarfiliornissanut aammalu Ilulissani Nuummilu mittarfinnik pioreersunik tallilerinissanut inatsisissamik Naalakkersuisut ukiamut inatsisartut ataatsimiinissaannut saqqummiussequllugit.

Taamatullu kommuunit sisamaasut piaarnerusumik nalilersoqqinneqarnissaat Siumumiit naalakker-suisunut kaammattuutigerusupparput, aningaasaqarnikkut kommuunini atukkat erloqinartumik i-nissisimanerat piaarnerusumik ilorraap tugaanut aallartinneqassappat Siumumi isumaqaratta Kom-muunit nalilersuiffigineqaaqqittariaqartut aggornilersugaanermikkut ilangullugu allangortinneqar-sinnaanerat eqqarsaatigalugu.

Tamatumunngalu atatillugu aningaasanut inatsimmik suliaqarnerni allaffisornikkut annertuallaamik ingerlatsineq annikillisinniarneqartariaqartoq ilanngullugu kaammattuutigerusupparput kommunit ikilisinneqarnissaannut ilaatigut tungaviuvoq akisussaafiit marloqiusamik allaffissorfiusut aningaa-sartuuteqarfiusullu annikillisinneqarnissaat taamaattumik ilangullugu Siumumiit paaserusupparput akisussaaffiit suut Namminersorlutik Oqartussaniit tulliullutik kommuuninut nuunneqartussatut pilersaarutaanersut marloqiusamik allaffisornikkut anigaasartuuteqarfiusut inuusutissarsiutinut anigaasalersuinermi annerusumik sangutinneqartariaqarmata.

**Inuusutissarsiornermi Aalisarneq:**

Nunatsinni siammasissumik nunaqariusitta tunngavigaa imaani inuussutissarsiorneq, tamatumani aalisarneq piniarnerlu eqqarsaatigalugit pingaarnertut oqaatigerusuppavut.

Rajarniarnermi pisassiissutaasut eqqarsaatigalugit pisassisutaasartut ikiliartornerat uparuartariaqar-sorinarmat, Siumumi isumaqarpugut raajartassat qaffanneqarsinnaanerit piujuaannartitsineq innar-linngikkaluarlugu pisinnaasoq Naalakkersuisullu tamatumani aqutissiuusseqqullugit kaammattuu-tigaarput.

Nunatsinni aningaasarsiutaasut pingaarutillit ilagaat qaleralinniarnaq, ilisimallugu qaleralinniarn-er-mi periarfissat imartani ilaatigut atunngisatsinni periarfissatigut aqqissuussinerit aallarereeraluar-tut, taamaattoq nunap immikkoortuisa ilaani inuit aalisarnermut inatsisip 2012-mi atuuttup mattus-sai suli tamakkiisumik aqqiivigineqanngitsut pimoorullugit naalakkersuisuniit misissoqquagut. Oqariartaaseqarpugut imminut pilersorsinnaaneq salliusariaqartoq, taamaattoq Siumumiit isuma-qarpugut imminnut pilersorusukkaluartut aalisarnerup iluani minnerunngitsumik nunaqarfinni qaleralinniarfiusuni najugallit aqutissiuunneqarnerat suli sukumiinerujussuariaqartoq, imminum-mi pilersorumallutik tamaviaaraluartut aqutissiuunneqarnerat kigaapallaarpoq, tamannali aqqit-tariaqarpoq.

Saarullit nunatsinni sumiiffippassuarni takkusimaleraluttuinnarput, annermillu iluaqutaanissaat anguniarlugu pisassiisutaasut amerlisariaqarput aningaasarsiornikkut annermik iluaqutaanissaat aalisartunit suliassaqartitsinermullu malunnaatilimmik atortariaqarivut Siumumi isumaqaratta.

Aalisakkanik akitsuusersuinissamik suleqatigiissuteqarnermi inatsisissami saarullit, nipisat il.il akitsuusersuinissamik eqqarsaatersuuteqarneq qanoq aningaasatigut isertitsissutaassanersoq eqqori-arneqarsinnaanngilaq suliaq qulaajaaffigalugu suli sukumiisumik paasineqanngimmat, taamaattu-mik aningaasanut inatsisip oqaasertaani aningaasartalerlugu saqqummiunneqarnera peertariaqartoq Siumumi isumaqarpugut. Qulaajaanerup takutippagu aalisakkat sorliit akimikkut niuerutigineqarne-rannilu akitsuusersuinissamut naleqqunnersut aatsaat aalajangiinissamut oqallisigineqarnissaat pisariaqarpoq.

**Avaleraasartuut:**

Ukioq manna avaleraasartoorniarnermi pisassiisutaasut tamakkerneqangitsoorput, taamaattorli ajunngitsumik sunniuteqarnissaat 2015-mut aqqissuulluangaanerusariaqartoq Siumumi isumaqar-pugut. Assersuutigalugu upernaq akuersinialuusaarneq eqqarsaatigalugu, angallatigut piareersar-nissaq eqqarsaatigalugu ilinniarfiusariaqarpoq akuersissutinik agguaaneq siusinnerusukkut pisima-suuppat tamakkerneqarnissaat ukioq mannamut pisassiissutit tamakkerneqarsinnaanerit ilimanarsin-naagaluar-mat, taamaattumik pereersut ilinniarfiusariaqartut Siumumi isumaqarpugut, ukiullu tullianut akuersissutinik piffissaagallartillugu agguaasineq pisariaqarluni akuerineqartut piareersar-luarnissaat misileraanermi pitsaanerusumik periarfissittariaqarmat.

Aalisarnermut inatsit kattuffiit susassaqtut peqatigalugit aqqissuuteqqinnissaa eqqarsaatigalugu siumumi suleqataassaagut, aalisarnermik inuussutissarsiuuteqartunut ajunnginnerpaamik sunniute-qartumik suliarineqarnissaa eqqarsaatigalugu.

Taamatullu uparuarusupparput Konto pingaarnermi 50.06.50.(aalisarnermut aningaasaliissutinut immikkoortitat tapiissutitut aningaasaliisutit) 2015-mut immikkoortitsisoqannginnera Siumumi

isumaqarpugut aningaasartalertariaqartoq, tamannalumi aningaasanut inatsimmut ilaatinneqaqqullugu piumasaraarput.

Aalisarneq eqqartortillugu, pisariaqarpoq aalisariutini aqumiunik kalaallinik inuttaqarneq qulakkiisallugu, taamaattumik naalackersuisunut kaammattuutigaarput aqumiunik kalaallinik amerlanerpaanik atuilermissaq ukiuni qaninnerpaani sulissutigineqassasoq.

Ilanngullugulu apeqqtigissavarput ullumikkut aalisariutit inuttaqarneranni aqumiunik kalaallinik atuineq qanoq nakkutigineqarnerasoq, Siumumi isumaqarpugut kalaallit aalisariutini aammalu nammineq pigisatsinni aqumiutut ilinniarsimasut atorneqarnerunissaat pimoorullugu sulissutigalugulu atortariaqaleratsigu, tamatumani Kalaallit Aqumiut Peqatigiiffiata suleqatigineqarmissaa kaammattuutigaarput.

Inuussutissarsiorneq, piniarneq eqqarsaatigalugu qaleralinniarluni aalisarnermut innarliisinnaasutut qilalugaqassusaata piaarnerusumik misissuiffigineqartariaqarnera Siumumiit kaammattuutigaarput, annertuumik qilalukkat qaleralinnik nerisaqartuunerat eqqarsaatigalugu, oqimaaqatigiinngitsumik inissisimalersinnaanera aalisarnermi pisassiisarnermut akornutaasinnaanera aarleqqutigisariaqarmat. Piniartut ilisimasaat malillugu qilalukkat amerlassusaat nalileqqittariaqarsorineqarmat pisassiisutaasartut eqqarsaatigalugit siunissami amerlanerusunik pisassiisarsinnaaneq ilanngullugu nalilersortariaqarmat.

Nunalerineq, siuarsarniarlugu iliuseqarnissaq aningaasaliisoqarnissarluni siusinnerusukkut inassuteqaataasarsimavoq tamannali aningaasanut inatsimmi 2015-mi ilaanngilaq, tamatumunga Naalackersuisut qanoq siunissami aningaasaliissutitigut aaqqissuussisoqarnissamik pilersaaruteqarnerisut Siumumiit paaserusupparput.

### **Sanaartorneq:**

Nunarput tamaat isigalugu sanaartornikkut siammasissumik aaqqissuussinissamik Naalackersuisut siunnerfeqarnerat Siumumiit iluarisimaaratsigu oqaatigissavarput, taamaattorli sanaartornermi illoqarfinni nunaqarfinnilu sanaartugassatut inatsimmi siunnersuutitut saqqummiunneqartut siammasinnerusumik aaqqissuusivigisinnaanerat ugartorusunnarpoq, tamatumani ilanngullugu apeqqtigissallugu upernaq 2014-mi inoqarfiit mikinerusut ineriartortinneqarnissaanut ataatsimeersuartinneqarneranni malitseqartitsinissaq siunertaralugu suleqatigiittussat suliaat sumut killinnersoq, aammalu siunissami aningaasatigut unammilligassat qanoq annertutiginissaat ilimagineqarnerasoq Siumumi paaserusukkatsigu

### **Suliffissaaleqineq:**

Ukioq manna suliffissaaleqineq akiorniarlugu suliniutit ilaatigut upernaq manna inatsisartuni ataatsimiinnermi sammineqarput, suliffissaaleqinerullu millisinnissaanut suliniutaasut ataavartumik malinnaafigalugillu suliniuteqarfiginissaat Siumumi pingaartutut isigaavut. Taamaattumillu tamatumani iliuutsit kinguneri pitsaasup tungaanut ingerlajartornissaanut Partiit tamattaalluta suleqatigiinnisarput pingaarluinnartutut Siumumi isigigatsigu oqaatigissallugu, suli suliaasaq angeqaaq taamaattumik suliffissaaleqinerup annikillissinnissaanut susassaartut peqataanissaat pisariaqarluinnarmat, tamatumani kommuunit aamma qanittumik peqataatillugillu suleqatigineqarmissaat Naalackersuisunut kaammattutigissavarput

### **Ilinniartitaaneq:**

Ilinniartitaaneq siunissami sakkussat pingaaruteqarluinnartut ilagaat, tamatumani meeqqat atuarfiat aammalu tamatuma malitsigisaanik ilinniarsiit ingerlariaqqiffiusut atugassaqtitaanerata pitsaasumik malinnaaffigalugulu aningaasalersorneqarnermigut sipaarfigineqannginnissaa Siumumi pingaarluinnartutut isigigatsigu erseqqissassavarput.

Meeqqat atuarfianni uniinnartartut ilaatigut pissutaallutik Piareersarfiit annertuumik atugaalersimapput, Siumumi isumaqarpugut Meeqqat atuarfianni Klassit tamakkerlutik naammassineqartannginnerata kingunerisaanik ilaatigut Piareersarfiit atugaanerujussuat annikillisikkiartuaarnissaanut meeqqat atuarfianni uniinnartartut sukumiisumik qulaajaaffigalugit, taamaaliornikkut ilinniarsinnut ingerlariaqqiffiusunut piaarnerusumik isersinnaaneq nukittorsarumallugu. Tamannalu anguneqarsinnaappat piareersarfiit siunissami annikillisineqarnissaat ilaatigut anguneqarsinnaammatt.

Siumumi pingaartutut isigaarput aningaasalersuineri tullerriiaaraneq pisariaqartoq aningaasatigut pisinnaasarput najoqqutaralugu, tamannalu erseqqissumik kommunit peqatigalugit sulissutigisariaqaripput Siumumi isumaqaratta Naalakkersuisunut kaammattuutigaarput.

Atuarnermi avatangiisit pitsaasut aamma atuarnermi pitsaasumik naamassisaqarusunnermik kinguneqassasut Siumumi isumaqarluinnarpugut, tamannalu kommuunit peqatigalugit suleqatigiissutigineqarpat angusassaq pitsaasuussasoq qularingilarput.

### **Takornariaqarneq:**

Takornariaqarnermi umiarsuartigut takornariartartut annikilliartornerat pillugu aningaasanut inatsikkut Naalakkersuisut iliuuseqarniarnerat tassalu akitsuutip appartinnissaanik Konto pingarnermi: 24.11.13 (umiarsualivimmiinnermut akileraarutit ) appartinniarneqarnerat Siumumi iluarisimaarat-sigu oqaatigissavarput, neriutugissallugu nunanut sanillersuutakkatsinnut naapertuuttumik aqqissuussineq pitsaasup tungaanut sunniuteqassasoq, takornariartaatit nunatsinnut tikittartut amerlinissaanut.

Ilaatigut aamma nunatsinni takornariaqarnikkut sullissineq eqqarsaatigalugu Visit Greenland Naalakkersuisunit eqqarsaatigisariaqartoq Siumumiit oqaatigissavarput, nunatsinni takornariaqarnerpaafiusartunut inissittariaqarnera assersuutigalugu Ilulissanut piffissangorsorinarmat, tamannalu piaartumik aqqutissiuunneqartariaqartoq Naalakkersuisunut kaammattuutigerusupparput.

Takornariartitsineq nunatsinni pingaarutilimmik inissisimavoq aningaasarsiornikkut tamatumalu atorluarnissaa pisariaqarpoq, pissutsinut malinnaalluni aqqissuuttuartaarluni aningaasaliissutaannaat eqqarsaatiginagit.

### **Utoqqalinersiutillit:**

Siunissaq ungasinnerusoq eqqarsaatigalugu utoqqalinersiallit aqqissuusivigineqarnerat pimoorunerullugu aqqissuuneqartariaqartoq Siumumiit kissaatigaarput.

Utoqqalinersiaqarneq piginnaatitaaffiuvoq taamaattorli saniatigut isertitaqartoqarsimatillugu utoqqalinersialimmut kingunerlutsinneqartarnera ilaatigut utoqqalinersiat millisinneqartarput, taamaammatt misissorneqartariaqarpoq saniatigut isertitaqarsinnaanerup qaffanneqarsinnaanera, iliuuseqarneq piffissangorpoq utoqqalinersiat eqqarsaatigalugit, tamannalu pimoorullugu sulissutigineqassasoq Naalakkersuisunut kaammattuutigaarput.

Taamatuttaa q isumaginninnikkut aaqqissuuseqqinnerit taamatullu akileraartarnikkut aaqqissuuseqqinnissat aallartisarneqartariaqarnerat unammillernartuugaluartut Siumumi pingaartillugit Partiit akornanni suleqatigiisutiginnissat neriutigaarput, amerlanerpaatigut paaseqatigiilluni sulissutigineqassasut kissaateqarpugut tamatumungalu Suleqataanissarput oqaatigissavarput piareersimaffigigatsigu.

Siumut isumaqarpoq isumaginninnikkut aaqqissuuseqqinnissaq nukinnillu annertunerujussuarmik atuiffiusoq Partiit akimorlugit suleqatigiiffigalugu aallartittariaqartoq.

Ilaqutariit nukittuut pilersikkumallugit kommuunit peqatigilluinnarlugit ingerlatsinerput annertusar-nissaa pisariaqarluinnartoq aammalu meeqqanik angerlarsimaffiup avataanut inissiisarnerit annertuallaartut Siumumiit isumaqarpugut, taamaattumik pingaaruteqarpoq ilaqutariinni ajornartor-siutit annertusinnginnerini siusinaartumik ajornartorsiutit suliniutigineqarfigneqartarnissaat.

### **Aatsitassarsiorneq:**

Siumumi maluginiarparput aatsitassarsiorinnikkut suliniutit unikaallasimaarnerat tamannalu uniffigi-nagu suliniutit nangittumik ingerlanneqassasoq kaammattuutigissallugu pingaartiparput, aatsitas-sarsiornermilu suliniutaasut ussasaarutigineqarnerat ingerlaannassasoq Siumumiit naalakkersuisu-nut kaammattuutigissavarput.

Aatsitassarsiornermik eqqartuittilluta aluminiumik aatsitsiviliornissamut suliniut Alcoa killiffia sukumiisumik paaserusupparput, tamatumalu sukataarunnerullugu sulissutiginnissaa ilungersortumik kaammattuutigissallugu.

Oliamik ujarlernerit unikaallassimanerat ilisimavarput tamannali isumaqanngilaq uuliamik ujarler-nerit unitsivinneqarnerattut, Siumumiillu kissaatigaarput tamatuma aamma pimoorullugu sulissuti-gineqarnera ingerlaannassasoq

### **Innaallagissamik pilersuineq:**

Nunatsini mingutsitsinngitsunik nukissiuuteqarnermi pitsaasup tungaanut ineriartorneq suli siunis-sami ingerlaqqittariaqarpoq, illoqarfiit mikinerusut mikinerusunik erngup nukinganik nukissiorfili-orneqarsinnaanerit nangittumik Naalakkersuisut ingerlatissagaat kaammattuutigaarput, ilaatigut siusinnerusukkut Qasigiannugit aamma Aasiaat misissueqqaarnermik nalilersuivigineqarnissaat tullinnguuttussatut Inatsisartuni pilersaaruteqarfiusimasut nangittumik suliniutigeqqinnissaat Naa-lakkersuisut suliniutigeqqissagaat Siumumiit kaammattuutigissavarput, erngup nukinganik nukissi-uuteqarnerup ineriartoqqinnissaa pisariaqarmat.

### **Aningaasaliissutissat siunnersuummi assigiinngitsut:**

Ataatsimut naatsumik piffissaritaasup killeqarneranik pissuteqartumik inatsisissamut siunnersuum-mi saqqummiussinnaasat amerlagaluartut immikkut Siumup pingaartitaatut makku uparuaaffigissa-vavut; Konto pingaarnermut: 27.01.07 (ICC) Naalakkersuisut aningaasanut inatsisissamut saqqummiussaminni, 2015-mut 1-mio kr-nik appaasoqarnissaanik ukiormannamut sanilliullugu siunnersuuteqaraluartut aningaasaliissutit aappaagumut ukiormannatut annertussuseqartinneqarnis-saat eqqarsaatigilluaqqullugu nunatta naalakkersuisutigoortumik nunanut allanut suliniuteqarneran-nut annertuumik ICC iluaqutaasumik inassisimanagera suliniaqatigiiffittut nunarput sinnerlugu Siumup pingaartutut isigimmagu, aningaasaliissutillu annikillisikkiartuarneqarnissaat aningaasanik appaarnermut naleqquttumik nassaartoqaraangat aatsaat appaasoqartarnissaa inassutigissagatsigu naatsumik oqaatigalugu, kaammattuutigaarput ukioq mannatut aningaasartai inassisimaannassasut.

Konto pingaarnermi: 87.11.09 Mittarfiit aqqissuusaanerannik annertusaaneq (sanaartornermut aningaassaliisit) Siumumi inaarutaasumik suliasap misissuiffigineqarnissaa pingaartutut isigaarput, aammalu maluginiarlugu inuussutissarsiutitigut ineriartortitsineq eqqarsaatigalugu Kommuuni Kujalliup atatsimoorluni pingaartutut Qaqortumi mittarfiliassaq tapersersora, suliasap inaarutaasumik missisuiffiginerani paasissutissat tamakkiisut pissarsiaritinnagit Siumup kaammattuutigissavaa mittarfiliornissamut aningaasatigut suliniutip avataanik aningaasalersornissaanut periarfissat Naalakkersuisut misissussagaat, taamaalilluni aningaasanut inatsimmi immikkoortinneqartut siunertanut allanut atorneqarnissat periarfissaalissammat. Pingaartuuvorlu inaarutaasumik paasissutissat nalorninaatsumik tikkuussippata tamatuma kinguarsarnagu sulissutigineqarnissaa aningaasalersuineq avataanit misissuinikkut aqutissiuullugu sulissutigineqassasoq, tamatumalu malitsigisaanik illoqarfinni allani naannerusunik mittarfiliorsinnaanerit aqutissiuunneqarnissat ilangunneqarsinnaalissammata, nunap immikkoortuini angallannikkut ataatsimoortumik aqqinissamik siunertaqartumik.

Tamatumunga ilanngulluni inatsissatut siunnersuutip oqaasertaani Tasiilami aamma Iddoqqortoormiuni mittarfinnut tunngasut soq ilaatinneqannginersut apequtigissavarput, taamatullu Ilulissani mittarfiup tallinissaanut kommunalbestyrelsep suliaqarnerata Naalakkersuisunik eqqumaffigineqarnerunissaa kissaatigaarput, avataanniimmi aningaasaliiniartunik suleqateqarnikkut Ilulissani mittarfiup tallinissaa kinguarsarnagu suliarineqarsinnaasoq kommunalbestyrelsip suleqataaffigalugulu kissaatigaa.

#### **Peqqinnissaqarfik:**

Peqqinnissaqarfimmi nakorsiat aammalu katsorsartissimallutik suliaritissimallutik Kangerlussuakut aqqusaartunut ilaatigut atugassarititaasut pitsanngorsarneqartariaqarnerat pisariaqavissoq Siumumi isumaqarpugut, ilaatigummi ilaasut utaqqisut akornanni ullup ilatsiarsua annerusunik aqqissuussaangitsumik nalinginnaasumik utaqqinermi peqqissarsimasunut atugassarititaasut piaartumik aqqiiviginiarlugit sulisoqartariaqarpoq, taamatullu peqqinnissaqarfimmut saaffissat tikittarfimmi ersarinnerujussuusariaqartut Siumut isumaqarpoq.

Upernaaq nunaqarfimmiut inoqarfiillu mikinerusut ataatsimeersuassutigineqarmata Kangerlussuarmi Nunaqarfinni Aqutsisunit aamma ajornartorsiut tikkuarneqarpoq peqqinnissaqarfiup tamanna pimoorullugu aqqinniartariaqaraa Siumumiit piumasaraarput.

#### **Sunnigiffik timersornerlu:**

Upernaaq inatsisartuni aalajangiifigineqarpoq nunatsinni ivigaasanik arsaattarfiliornissamut suliniutit aallartinneqassasut, tamannalu ingerlateqqillugu aningaasanut inatsimmi ukiunilu missingersuuteqarfiusuni takusinnaangilarput ivigaasanik arsaaffiliorsinnaanerit tamanna iliuseqarnermik malitseqassasoq Siumut isumaqarpoq. Ivigaasanik arsaaffiliornissanut aallarniutitut 2015-mut aningaasaliisoqassasoq Siumumiit piumasaraarput, taamaalilluni ivigaasanik arsaaffiliornissanut uper-naaq aalajangiunneqartoq malitseqartinneqarniassammat nunaminertat kommuunit suleqatigalugit suliniaqatigiiffiillu tamatuminnga suliaqartut piareeqqaneri aallaavigalugit suliniutit aallartinneqarniassammata, piviusunnigortitsinissaq pingaaruteqarluinnarmat.

#### **Sumiiffinni talittarfeqarnikkut aqqissuusseqqineq:**

Nunatsinni sumiiffiit ilaani talittarfeqarnikkut ajornartorsiutaasut qaangerniarlugit qanoq nunatsinni tamatumunnga siunissami tulleriiarisooqarnerisooq Siumumi paaserusupparput, illoqarfiimmi nunaqarfiillu ilaanni pisariaqartitsisoqarpoq, tamannalu aqqiiviginiarlugu pilersaarummik tullerii-

aarinikkut aningaasalersuinnermut tungavissamik pisariaqartitsisoqarnera pinngitsoorneqarsinnaanngilaq.

Siumup aningaasanut inatsimmut siullermeerinermi pingaartitai amerlammata, tamakkerlugit oqaluttarfikkut oqaatigineqarsinnaanngillat, piffisaq atugassaq killeqarmat qulaanilu saqqummiussavut aningaasanut inatsisissamut siunnersuummut saqqummiuppavut Partiit allat suleriaqqinnissami peqatiginissaat qilanaaralugu.

Aningaasanut inatsit Siumup amigartooruteqarfiusumik inernejarnissaa akuersaarsinnaavaa aningaasanut inatsit anguniagaqarfiusumik nutarterinissanut aallarniutaasinnaasutut isigisariaqarmat.

Sanaartortitsinikkullu saqqummiunneqartunik annikillerinnginnissaq pingaaruteqarluinnartutut Siumumiit naggataatigut erseqqissassallugu 2015-mut aningaasanut inatsisissatut Naalakkersuisut saqqummiussaanut Siumumi taamatut oqaaseqarluta aappassaaniinnginnerani aningaasaqarnermut akileraartarnermullu ataatsimiititaliamut suliarineqarnissaa innersuupparput suleqatigiiffiulluarnissaanik neriuuteqarluta.

Jens Immanuelson, Siumut